

四庫全書

集部

欽定四庫全書

集部

武夷新集卷十九

二十九

詳校官監察御史_臣李陽樾

檢討_臣何思鈞覆勘

總校官中書_臣朱鈐

校對官中書_臣葉葵

謄錄監生_臣馬紹基

欽定四庫全書

武夷新集卷十九

宋 楊億 撰

啟

二十五首

上陳州李相公啟

比者肅奉簡書言旋京邑經涂攸出授館未遑忽迂丞相之車俯及旅人之次置之右席接以溫顏趨衛幕之巖初令長揖設曹樽之味猶許獨醒乃至芻禾百車遽豆九品一日再駕式顧於郵亭終夕九迴不遑於肺腑

加以預西園之宴陪東閣之賓奉簪履以為榮羨車魚
而徒切禮唯異數恩實非常褒稱極華袞之殊顧矚比
陽春之煦玉笋斟酌靡許固辭台座熒煌尋容下拜得
廁原嘗之上客復見陰郭之小侯且陪秉燭之歡仍恕
吐茵之失挹江海之量寧測沖深聞俎豆之談自驚淺
陋獎憐彌極短拙尤多燕昭築臺雖從郭隗而始陳蕃
解榻誠非徐孺莫當以此揣循若為勝克幸盤桓於信
宿得企仰於雲天屬發軔之靡遑嗟戀軒而何及旣眴

之雜佩又出次長亭元戎十乘以啟行清酒百壺而帳
飲都人改觀行路增輝矧乃慮逆旅之餒而別輟萬錢
之饌念中遠之勞止特假千里之駒使飽德之無厭且
致遠而不泥何漢相之至重顧魯儒之太深吐握之勤
實光於令德鳴吠之賤豈忘於大恩循載籍以遐思撫
方寸而內激述王粲從軍之詠良或未諧慕馮諼市義
之心終期有報感戴之至伏切下情云云

又

近奉柔毫遠塵台聽敢冀巖廊之重特貽尺素之文華
袞被躬自知其幸夜光在握誠足稱珍捧讀已還兢榮
無措竊以漢薛宣之故事未嘗移書晉何曾之持衡不
答小紙蓋丞相之尊重與庶位以懸殊名既不同禮亦
異數如某者材質駑下門閥寒微謬參多士之林得食
上農之祿雕蟲篆刻恥子雲之壯夫抱慙懷鈎非董狐
之良史質于清議究在下流自知甚明內省尤熟豈謂
相公推好賢之雅旨敦與進之虛懷採畫餅之名厚築

金之禮憐潘岳之拙宦深嘆數奇許子夏之言詩曲加
護短置于客右借以月評垂耳之駒驟增十倍之價拖
腸之鼠如餌九轉之丹窮途有依鍛翮重奮比至京國
傳聞搢紳假之餘光無不改觀矧又金簡玉字別示于
溫存圭竇華門頓生于氣燄恩極丘山之重心非木石
之頑瞻儉幕之芙蓉雖遙盛府望傳巖之舟楫終濟迷
津眷言蓬艾之微必期頂踵之報

謝太僕錢少卿啟

少卿進咸平聖政錄
及詩自將軍改官

右某啟數日前少卿特枉軒車俯臨蓬華仍以編綴曲
示顙蒙顏巷蕭條既迂長者之轍趙囊牢落忽得隨侯
之珠絨滕載披毛髮俱聳竊以述作之妙謂之聖明賦
頌之興本乎風化其有沿襲或異步驟不同虞卿窮愁
乃就著書之業揚雄寂寞始奮草玄之名靈均放詞初
因于憔悴蘭成述賦實主于悲哀未有世傳帶礪之盟
身居環列之尹敞北闕之甲第屋瓦生烟乘大宛之名
駒汗血流赭列鼎而食執玉以朝名亞春陵勢奪張霍

而乃賤青紫如拾芥比富貴於浮雲優游文史之場躬
親布素之行折節待士多擁篲以先驅焦思窮經或下
帷而終日以至學成麟角才掞天庭思若湧泉文類摘
錦漢宮誦賦萬乘喜於同時梁苑陪遊羣公推於右席
門登龍而比峻談揮麈以彌清諸生慕義以益勤名卿
願交而斯衆芳猷載洽雅志將伸固已簡自天表騰于
物論紀一人之言動何讓策書貢二雅之聲詩有裨樂
府召試鼇山之署式搖雞距之毫不加點以成章未旋

踵而拜命亞卿班列既參惟月之崇太僕職司仍預奉
車之寵昔漢光武之偃革諸將競鄉學之心唐憲宗之
厭兵近臣有改名之請以珪璋特達之質當干戈載戰
之秋捨蘭錡之師就儒冠之飾教閱詩禮昔為謀帥之
資慷慨經綸今挺致君之志羽儀通籍輝映薦紳敢謂
下顧蝸廬特留鳳藻享海鳥以九奏誠非所宜投井龜
以兼金都不之惜退自循省靡敢遑寧豈圮橋授書憐
其可教將延陵聽樂許以知音唯蹈詠以忘疲庶傳玩

之無數願言厚意何以克勝其盛製輒留繕寫

代僧求薦啟

右某啓某聞操刀必割君子慮其失時拮囊不言先儒
譏其有隱敢傾方寸上扣高明蓋恃特達之知不虞進
越之罪伏念某早親空諦尚昧真筌誦岐伯之方書勤
拳斯久辯農皇之藥品區別尤難名非三折之良術寡
十全之妙所幸者每趨門仞席揖儀形以桑梓之情曲
垂顧盼在茲芻蕘之列實覺輝光蓋香火之宿緣非頂踵

之能報豈合輒披懇素仰瀆尊嚴誠際會之有因亦蘊
藏之無及伏覩聖節俯近允澤將流在計相之大臣乃
空門之外護並奏縉徒之名字得沾象闕之恩華以某
法苑微流醫門末伎結二林之社豈敢攀緣瞻數仞之
牆深思提挈願賜律師之號仍希廣濟之名俾塵跡之
增華亦鄉關之改觀敢不窮青囊之祕訣以奉指蹤誦
貝葉之真文用資壽考懇激之至無以喻陳

又代謝薦啟

右某啟某近蒙侍郎台念特奏表聞伏奉勅恩授前件
師號者絲綸之命雖薦降於九天緇褐之蹤若頓超於
十地祇荷恩獎伏切兢榮伏念某奈苑微流曹溪末派
偶拋塵累竊味真詮誼誦岐伯之方書莫探秘術開生公
之講席徒慕遺馨幸以久寓神準屢登峻閣維桑序舊
最承一顧之私惡石獻能曾寡十全之効荷眷憐而實
厚省孱冗以難勝所希且躋韻海之堂尚陟龍門之坂
賓階請見或當休沐之辰藥劑服勤永奉指蹤之用豈

謂節臨于載誕便諧名達于四聰特加溢美之稱實滿平生之願朋儕改觀價十倍以頓增頂踵酬恩身一毛而為喻此外精虔香火祝頌雲天願憑衆善之因克遂至誠之懇台司書考與郭令以攸同仙籍延齡將老彭而為比所冀苾蒭之末永參桃李之餘託跡有歸捐軀何惜

上陳州李相公啟

右某啟比者相公執玉來朝捧觴上壽彤庭就列為百

辟之儀刑宣室疇咨見一人之體貌漢殿禮成于薦璧
淮揚民望于迴轅子年戀闕以雖勤申伯于藩而是賴
十乘攸往見元戎之啟行九里非賒固京師而蒙福騎
竹赴兒童之約依蓮慰賓客之心某特受獎稱迥殊倫
等供東門之祖帳宜綴簪裳望南浦之仙舟合辭麾蔡
屬以編纂莫遂懇誠羨文學之託後車空馳精爽同燕
雀之棲大厦彌戀恩知

又

右某啟昨者相公榮自藩垣入朝宸極晝日三接載延
乃眷之恩泰階六符式顯具瞻之貴東閣幸伸于趨拜
中堂過沐于延容聽談柄以忘疲侍坐隅而甚久慙非
子夏敢預于言詩竊媿穆生何勝于置醴矧又相如之
四壁兩辱千秋之小車時屈丞相之尊親顧旅人之次
一瓢牢落顏回之巷可哀三日氤氳荀令之香不散實
交遊之光寵固里巷之輝華夫何下僚當此殊獎非木
石之無識摩頂踵以不忘伏自節過流虹禮成薦璧在

鎬錫宴畢上公九獻之儀分陝言歸還天子二老之任
旌旆將離于闕下壺漿已擁于道旁南陽細民再得于
父母河東近郡深倚于股肱恭惟仙舟尋達雄關戎政
甚肅同卧治之有餘品物向榮諒行春之非遠限以匏
瓜之繫莫忝簪履之微空瞻桂樹于小山深羨雞鳴之
下客攀戀之至倍萬愚衷

又

右某啟某伏念引籍金閨修書石室仰台階之符采宛

在層霄感國士之恩知豈忘丹慊恨一官之所繫瞻數
仞以為勞徒憑咫尺之書遠黜巖廊之聽敢期折簡俯
及下僚屈伊鼎之崇高顧魯儒之寒賤鄙條侯之倨貴
曲示謙光憐顏子之固窮倍加存卹內省不材之質何
酬特達之私春物向繁幕府多暇淮陽臥治况善政之
已成征虜雅歌諒素風之斯在恭惟宴集之外福祿具
膺王商儀形永居漢相段干偃息長作魏藩載光夾輔
之勲長享具瞻之貴禱頌之至倍萬常情

代人與淮南王轉運啟

竊以山澤之利多出于東南漕引所經率由于淮海綿地萬里通貫五都實國計之是資乃邦本之攸繫苟非明達豈副選掄恭惟郎中識茂經綸學窮緇素決科虎殿由射策以馳名引籍駕行遽揚旌而出使較縣官鹽鐵之利均郡國關市之征析毫恥務乎纖微運算自成于餘羨奉千金之費物力靡殫精九歲之儲倉廩皆實故得益隆眷注更委事權佐計相以如初商功利而尤

密運蜀漢之紅粟即見方船聚吳會之金錢便應朽貫
出於餘地久屬全才昔漢倚關東之典區漕輓相繼唐
置江西之留務財幣畢臻古今之形勢率同邦家之用
度斯出心計素熟佇論駟馬之功賞典聿行須荷富人
之拜實惟公議豈竭愚誠

與祕閣錢少卿啟

右某啟伏審光奉聖恩榮升祕府恭惟慶慰竊以上帝
藏書是開冊府近臣侍詔爰設直廬所以裒集秘文講

求隆典復石渠之故事繼炎漢之得人若非奇才豈庸
是選少卿學士家傳帶礪身襲龜綢忠謹樹勲吳芮早
書於甲令積善餘慶畢萬獨享於魏封而自更宿周廬
入升環衛貞師北落不倚將軍之尊襲爵東吳靡恃王
孫之貴但絕編而嗜學常閉戶而著書萬里立功頗輕
定遠三都述賦高揖太冲一人深喜於同時九寺俄遷
於少列以才望之充積果恩寵之便蕃太僕奉車方欽
於貴盛祕書內閣旋直於深嚴用旌稽古之功尤洽當

仁之論眷惟職業素所蘊崇校石室之遺編佇分四部
侍柏梁之高宴即賦七言然陪清蹕之遊更獻從臣之
頌梁園旨酒居客右以無疑謝砌蒼苔代王言而在即
適增欣抃遽辱緘題仰承謙退之私何勝勤厚之意感
激慙愧不任下懷

謝史館馬兵部啟

右某啟伏審光奉聖恩榮升仙館恭惟慶慰伏以述作
之任褒貶尤先歷代所難遺編可復闕里之七十子獨

邱明之授經春秋之二百年唯董狐為良史矧設官之
斯在固非賢而勿居側聽殊遠實由慎東兵部學士學
精玄史識茂經綸射策決科早擅場于多士影纓就列
久陪議于外庭出分郡守之圭符入佐縣官之鹽鐵民
謠載洽式露冕以行春國用益饒恥耕毫而言利屬巴
岷之致討方臺閣以選賢爰整使車遠調兵食木牛流
馬千金之費無虧玉壘銅梁三捷之音繼至臬巢已盡
騶騎爰來青蒲屢奏于便宜錦帳榮遷于秩序仍授載

言之任克彰遺直之風延閣討論雖假獲麟之筆坤維
漕輓猶煩乘駟之行豈增秩以勸能實藉才而集事佇
及瓜之受代方汗簡以成書某早仰芳猷幸陪清列適
遂親仁之懇未伸致賀之儀敢冀恩私特遺緘尺願言
內省非所克當

謝除左司諫知制誥啟

右某啟伏奉制命蒙恩特授前件官知制誥仍改賜章
服者代言之任實演于絲綸賜服之崇莫過于銀艾仍

進東臺之秩便叅右掖之榮苟非名流不在茲選祇荷
成命若無所容伏念某才不兼人學非博物關西清白
徒襲于素風天祿校讎偶塵于美仕久居諫署莫貢阜
囊預草國書謬刊青簡尋一麾而領郡凡再歲以歸朝
宿于交戟之中唯思幙被班在赤墀之下深媿影纓蓋
自知之甚明亦不能而將止銜驚者千數豈敢請于公
車諫諍者七人未嘗攀于殿檻官守之方既失食浮之
議已喧敢冀明恩併加殊寵補袞增秩任在于彌縫視

草求才職思于潤色及奉延英之對更頒命服之榮鳳
閣徊翔已玷巢阿之地鵜梁忝竊曷逃濡味之譏矧惟
星垣上法天象熒煌之座出處近于三台清切之司動
靜遵乎四禁紫宸揮翰垂作曲謨紅藥裁詩形于騷雅
為仕進之極美顧鄙陋以寧堪伏揣噐能深惟職業尺
一之詔書填委但懼稽留六曹之奏議紛紜將何平決
但省躬而增惕念奮跡之有因此蓋某官欽奉昌圖勤
求片善採虛名而畫餅獎薄伎于雕蟲揮麈尾之談曲

垂題品借羊角之勢使得搏扶敢不摩厲以須僂俛從事庶逭假人之謗用酬知己之私過此已還未知所措

與史館晁司諫啟

伏審光奉聖恩榮加寵命伏惟慶慰竊以周有司諫之職所以名官唐設大夫之階因而命服處諍臣七人之任超散官五品之榮仍兼史閣之資實聳士林之觀司諫學士瑰琦邁俗純粹積中負王佐之偉才擅人倫之嘉譽至誠遇物固璞玉以渾金餘力為文必摘錦而布

繡自決科于丹陛便隨牒於四方主父欲厭于官遊賈
誼始聞于召對職司直筆削青簡以惟勤班奉內朝服
皁衣而已久果上書于闕下旋對策于禁中三道既成
推平津于第一萬乘斯覽喜相如之同時遂詔有司亟
遷好爵華袞之職俾効于彌縫名山之書再加于論次
既臨軒而延見仍賜服以褒崇朱紱被躬式將旌德嘉
魚發詠用慶得賢固將大樹風聲克揚職業三進及雷
一言興邦更彰謇諤之名便厯訏謨之任豈但文石之

上為鴛鴦之羽儀蘭臺之中正魯魚之譌謬顧惟祝望
實異等倫

與祕閣黃少卿啟

右某啟伏蒙尊慈以某忝奉天恩擢司帝誥特遺雅風
之什過形溢美之褒捧閱已還榮朽交集竊念蜀堯末
跡章句諸生秉筆屬文不過篆刻影纓筮仕謬列校讎
蘭臺既接于羣英文陞復忝于近列北闕之下本嘗貢
于皁囊東觀之中但恣窺于縹帙徒荷掄材之惠尚迷

進德之方莫談天祿之玄空索長安之米今者忽膺東
拔驟荷甄陞進秩本司代言右掖銀青三品之綬已媿
曳婁絲綸五色之書將何演暢矧宦遊之最美而地望
之尤清上應紫垣法星辰於大象旁連黃闥接步武于
台司方興誦而是虞忽雅言而為貺松茂柏悅蓋臭味
之靡殊玉振金相但佩服之無數矧推稱之太過實藻
麗以相宣有二雅之遺風乃一時之絕唱隨侯明月既
類暗投郢客陽春其如寡和但口吻而成誦仍筐筥以

深藏然以薄才自此增價雌黃已定永依月旦之評華
袞為榮更比春秋之字願言感佩曷可數宣

與梁舍人啟

右某啟伏自拜恩已伸面賀恭惟舍人壺氷峻彩巖桂
英標稟秀氣于岷峨振雄名于京洛學惟覩興入聖域
而已優辯可離堅占議園而無敵品格素高于月旦詞
華早挾于天庭爰自先朝便升清貫內佐計相外剖使
符體寬大以布詔條用文雅而飾吏事坐棠聽訟克播

于歡謠視草求才東膺子急召爰九重而肆覲見萬乘
以垂知宣室延登問鬼神于前席禁林試可給筆札於
尚方一時之紙價頓高翌日之絲言薦降南宮臥錦旣
改七兵之曹西掖封泥便裁五色之詔將啟迪於帝載
實焜耀於儒林平奏議於省中佇申明於唐制頒號令
於天下固誕布於堯言三代之風不日而復某聲塵無
取名輩相遼偶諧附驥之誠亦在續貂之末幸依先覺
必免至于面牆怯見大巫已自甘於閣筆然得親於蘭

室須強屬於鉛刀顧函丈之有期忽尺題而為貺仰荷
勞謙之旨愈增反仄之懷內省庸虛何以勝克

謝諸學士啟

某啟伏蒙尊慈以某近被渥恩獲塵禁掖猥以嘉什見
獎薄材側聆變雅之音益認相先之分耽翫無斁愧赧
彌增竊以省闈是分名數尤重中書右掖專掌於王言
太微西垣取法於天象樹棲雞而閣巢鳳地望頗清堦
翻藥而砌依苔頌聲猶在苟非才標國器名動京師何

以草尺一之詔書當三府之奏記如某者學無師法行
匪瑰琦顛沛未省於違仁迂闊終非於曉事徒荷兩朝
之顧獲叅多士之林宦路乘軒有同野鶴諫垣緘口更
類寒蟬自解郡符尚塵書殿影纓謁帝猶接先生之並
行返服歸田欲賦幽人之長往不謂出於非次忽被殊
遷擢居清切之司得裁寬大之詔進秩東省既絕曹於
七臣請對西清仍賜服於三品顧官箴而彌懼忽風什
以見貽曲借聲光備彤藻繪盛飾嫫母豈足揜於陋容

輕擲隨侯曾不惜於至寶絕唱固難于屬和厚意深切
于佩銘唯將雅言徧示知者金相玉振已傳誦於搢紳
墨妙筆精更深藏于篋笥珍重之至倍異等倫

與薛舍人啟

右某啟伏自光奉天恩已伸拜賀伏以舍人汾陰令族
稷下名流擣詞挾天聚學成海千文磊砢材實任于棟
梁十德瑰琦器自標于瑚璉早踐揚于近署久薰灼于
大名羣公懷居右之慙萬乘恨相得之晚調兩河之兵

食遂輟輜軒裁五色之詔書爰陞瑣闥華星列位既上
應于哀烏文石分班且日趨于翔鳳固已給北宮之雙
筆判西掖之五花思若湧泉吏將脫腕盤石尚在念祖
德之不忘青紙遠頒見王言之誕布固湯誥禹謨之可
復豈元和長慶之足云某品格非高資望素淺慕義不
已徒顧于執鞭受寵若驚敢希于結綬附騏驎之尾或
千里之可期草鳳凰之書憂一詞而不措北面永伸于
師事東家豈恪于誨人庶承善誘之恩少逭曠官之責

特蒙殊念曲示表牋仰戴重知無任下懇

謝賢良登科查正言啟

某啟伏覩拜恩已伸面賀竊以漢崇儒術始策問于賢
良唐設制科多東求于將相既公卿而表薦亦郡國之
計偕延見于白虎之廷召試于紫宸之殿設以三道必
人事而直言賓于四門咸茂才而異等由是仲舒鼂錯
明精稷相盪之源居易微之中才識兼茂之選故西京
號為得士貞元謂之尚文烈于聖朝聿修墜典萬乘端

冕坐于武帳之中羣臣影纓侍于文石之上設幄幕之
九張給簡牘之三千賜盛饌于大官示溫顏于前席東
帛加璧顧未為優築館以金曹何足算而某官欽承清
問奮發雄才翰動若飛文不加點吾丘之智略輻輳自
謂少雙平津之條對精詳果居第一天子屢形於歎息
諸公咸願于服膺足光仄席之求旋降出綸之命仍于
翌日復對兩階天威不違猶恨相得之晚異人間出必
立非常之功方偃伏于下風忽捧承于華檢仰窺謙退

非所克當

代溫大儀謝史館盛太博啟

數日前特沐眷私曲貽編集窺捧之際降歎尤深竊以
雅頌之興實由乎王澤風騷之妙別稟于天機苟非命
世之流豈在言詩之列太博逸才泉涌麗藻星繁識窮
象帝之先學覩孔堂之奧一自奮飛閨籍冠映儒林獻
頌宸居固有凌雲之氣援毫史閣已成繫日之書餘力
需然英詞煥發窮萬殊之奧賸究四始之本源探驪龍

以得珠截文犀而取角不假江山之助而才過楚人非
由夢寐之祥而思清謝客何連編之斯獲但成誦以忘
疲便欲寫于屏風題于團扇同箴銘之例勒在盤盂比
書札之珍置之懷袖表詠歌之不足庶佩服以無厭齊
國聞韶雖已臻乎忘味荆山抱璞亦終類于暗投感厚
意之近臨豈多談之能盡

答舒州孫推官啟

某啟數日前伏蒙尊慈以瀟山詩筆兩編曲垂惠貺耽

翫之際歎服彌深竊以王粲從軍嘗聞流詠蒙莊試吏
亦復著書頗或名家兼彰傳誦其如文多齊氣深貽舒
緩之譏道異丘門用成恢詭之說非優入於聖域尚垂
厥于方來推官員外命世之才為時而出膺五百之運
豈媿史遷冠三千之徒獨稱顏子矧于同氣俱負大名
一枝連得于桂林兩驥並馳於金埒雄詞冠古將挾天
庭後進望風如登龍坂為斯文之盟主擅當代之師門
自屈佐于初筵亦久沉于下位矧羣舒之劇郡控九江

之與區皖伯古城舊主咎繇之祀瀟峰勝地曾經漢武
之遊真仙所憑司命有集靈之宇禪林特盛祖師開說
法之堂朱邑桐鄉之遺祠魏令望江之舊治著于方志
並在郡封標舉猶存風流未遠自昔登高能賦始為大
夫因事陳辭爰稱作者故涪陽極浦騷人所以寄懷太
邱豐碑伯喈稱其無媿竊尋高致實慕前修或奮發雅
言建裁麗唱或磨礱翠琰載刻好辭叩寂課虛若玄珠
之斯獲飛聲騰實同華袞之為榮其餘珪璧相輝咸韶

並奏乍窺武庫徒懼于鋒鋌初涉天池豈知其涯涘頗
同投暗但冀服膺顧惟倦談靡能盡意其盛製輒留繕
寫

與史館陳大丞啟

竊以國家東求時彥論次國書用階炎漢之得人克就
陶唐之大典頗重斯選實難其才蓋筆削是資褒貶攸
出七十子之內雖卜商而不敢措詞數千載之間唯馬
遷而斯為實錄布在方策皎若丹青苟非洽聞豈能善

繼太丞學士學探聖域道冠儒林鍾間氣于岷峨襲遙
源于汝潁策名天府早登鄉老之書束帶周行久從大
夫之後中都佐治殆絕飲羊南海頒條嘗聞祭鱸克紹
昔賢之美聿彰循吏之稱式覩徵還爰從試可覽長卿
之詞賦既喜同時任南史以策書允資遺直固將申明
微旨綴緝闕文石室明堂正圖籍之散亂甘泉太液奉
輦輅之宴嬉載叅法從之榮更懋成書之業自聆美拜
方愜丹衷敢辱牋題過形詞旨

答集賢丁孫二寺丞啟

竊以漢庭下詔是設賢良之科唐室聚書乃開麗正之
殿非懷才傑出命世挺生識際天人學該玄史將何以
敷陳三道塞清問於當陽區別九流究微言于隆簡此
為慎選允屬當仁學士巖電竒姿天球逸韻翔而後集
同威鳳之得時聲必成文類洪鍾之待扣一昨聖君虛
佇明詔誕敷舉爾所知公卿開慰薦之路輔予不逮制
策有勞謙之言供筆札于尚方臨軒墀而旰食文不加

點益仰惠多之才喜於同時猶恨相見之晚允契得賢之美果膺加等之恩佐惟月之卿曹升集仙之書府碌碌如玉固待價而已沾菁菁者莪但育才而俟用某內惟慶幸獲覩騫騰白虎深嚴已窺條對紫微清切仍草除書亦契黃緣唯增企慕敢期眷念特示賤題仰披藻緝之詞彌切欽降之懇

答集賢李屯田啟

伏以郎曹之設地望頗崇議三臺之政刑分六聯之事

任更直建禮伏奏明光含香握蘭趨走於丹墀之下錦
帳綾被偃仰於畫省之中選侍史以護衣賜大筆而起
草應星纏於玄象振羽儀於周行自非挺田鳳之風標
負黃香之問望賦成平樂枚臯擅於多才對罷雲臺鄧
攸推其博識在於慎東豈稱僉諧郎中學士名冠士林
學探聖域梁園奏技曾參賦雪之流衛幕從軍幾擅愈
風之妙自入奉於朝請仍典校於圖書屬膠庠大闡於
素風屋壁傍求於墜簡正石經之訛舛鏤金版以流傳

咨五行俱下之能辯三豕渡河之謬鉛黃斯畢克彰稽古之功綸綍載行式懋成書之業既望郎而進秩復仙殿以兼榮雖省闥以分曹且禁垣而通直佐八座以利槩時入文昌之宮接諸儒而討論未離羣玉之府實為清顯允稱翱翔載惟遠大之程固應翹企可俟

謝門下李相公啟

伏蒙台慈特示及蘓州重玄寺彌陀院新大藏經碑草本者盥手捧持洗心諷誦醍醐灌頂頓覺清涼簫韶在

懸自忘滋味豈嗟嘆之所及固鑽仰以彌堅恭惟相公
以無礙辯才住第一義諦千方遊戲聊現宰官之身萬
行圓成自是法王之子蓋以靈山付囑實託大臣震旦
流傳雅資外護受佛真印為世導師運悲智以濟羣生
體忠貞而翊明主心如金石功等塵沙一念不生諸相
皆離推求靡得若環之無端應接忘疲猶鍾之待扣且
以十二分之教五千軸之文始乃一事之因緣終由五
性之差別捨文字而非法深念淨名之言會權實以歸

宗思聞大雄之旨因芟芻之勤請值廊廟之餘閒退食
宴居虛室生白來興灑翰湧思如泉煥乎文章所以聳
動頽俗歷然境智所以誘掖迷途揭慧炬於昏衢指寶
藏于貧宅祇園四衆誠所歸依秦市千金固難增損式
護持于末法用佐佑于能仁又何必內史翻經廣譯五
天之語長者著論深談九會之因諒簡妙之攸資非擬
議之能及某謬窺教典殊懵端倪每咨事于閣中幸拜
塵于牀下或因更僕之頃必聆出世之談既覺悟于輪

迴方咨嗟于孤露入彌勒之閣頓獲圓通并闕里之堂
敢希殆庶而相公憐其可教許以知言雄文纔絕於麟
毫副本遽傳于蝸舍非子期之善聽豈辨流水之音雖
野人之至愚亦識負暄之快然學道須資于勇猛至理
豈尚于撓謙况蒙印可之私益勵勤行之志踴躍無已
得聞半偈之指歸主伴是期願見一生之補處慶幸之
至倍萬常情

代人謝鄧州錢太傅啟

竊以敦詩閱禮晉求元戎之才察俗觀風唐重廉車之
任自非翁歸之文武兼備吾邱之智略少雙夙簡萬乘
之心曷奉十連之寄太傅識推王佐道出生知鍾間氣
于一時踐亨途于早歲掌命書于內署言成典謨總機
務于中樞道光啟沃俄切北堂之榮養懇辭溫室之近
班鉛黃再就于圖書桴鼓尋清于京輟兩河作鎮祇談
笑以安邊三輔乘輅得便宜而從事前席之恩彌厚出
綸之命遂行雖南陽地雄已列通侯之籍而東山望在

未慰蒼生之心佇立奇功以駭羣聽用表法宮之命將
如下九天便歸台席以致君式躋二帝顧惟善頌實在
于茲

武夷新集卷十九

欽定四庫全書

武夷新集卷二十

宋 楊億 撰

啟

上河陽太師相公啟

右某啟伏審榮鎮近藩已赴禮上伏惟慶慰伏以太師
相公靈鍾象緯識茂經綸宣勲力于兩朝決機謀于千
里傳巖良弼聿彰啟沃之勤鄰國宗臣克著規隨之効
爰擁旄而出鎮亦緩帶以臨戎再秉鴻樞薦升黃閣行

臺肇建總北落之雄師斥候載嚴制南侵之黠馬聊運
七擒之妙亟傳三捷之音榆塞塵清既高枕以無事芝
泥詔下遽介圭而來朝前席延登捧觴稱慶一人虛佇
載加體貌之恩六纛啟行式煥股肱之地表海益光于
賜履誓河用示于報功矧裂壤數圻經途四達茲為巨
屏實控上游偃息作藩既增重于九鼎詩書為帥固坐
鎮于百城永隆夾輔之勲聿享期頤之筭某忝承台獎
實切虔祈

答京東轉運史館姚起居啟

竊以螭陛記言任專筆削隼旗按郡職在澄清所以建
使節于外臺彰朝纓于文陞底慎財賦致軍國于富强
昭明策書舉春秋之凡例自非蘊析豪之精力負挾天
之雄才聿當虛佇之辰豈副至公之選起居學士氣衝
斗極名震京師學通亡篋之書理勝論都之賦一自決
科漢殿通籍周行出頒詔條允洽二天之詠入奉計最
亟延三接之恩爰飛步于亨衢久育材于近署次宸章

於栢殿典秘記于蘭臺諍臣七人夙推謬謬王畿千里
嘗督轉輸京坻載集于見糧縻肯固彰于餘地昨以河
出砥柱如竹箭以奔流郡厯東平致金堤之壞決宣房
未塞夷儀卜遷瓠子興歌正下淇園之竹原田發詠大
懼厯陽之魚暫輟英賢式撫新邑期會簿書之急繕完
版築之勞祗役惟寅成功甚速水反故道免東海之桑
田人服先疇識新豐之雞犬永無虞于昏墊實仰賴于
神明既安堵以阜生將解龜而受代載加命數仍委事

權當九重注意之初在列郡承風之地海岱之壤俗號
富饒齊魯之邦氣多舒緩諒宣寬大之詔用躋仁壽之
期至如奉三尺之行書克勤刺舉調千金之粒食無事
誅求此又揜心計于研桑笑霸圖于管樂良史之任聊
為假道之資富人之封固可翹足而待某幸窺除目方
切欣愉遽辱長牋過承謙損願言銘佩無以喻云

答史館盛屯田啟

竊以四方上計實領于南宮三署為郎遠從于西漢主

文書起草者蓋出于妙選掌戶口墾田者素號于劇曹
自非籍甚聲猷閑練故實述平樂之詞賦飄飄遊天地
之間挺京兆之容儀堂堂出風塵之外即何以更直建
禮趨走赤墀之途典校鴻都筆削素臣之傳欽聞成命
允謂當仁員外學士學殖堅深神鋒耀穎擅東南之美
馳譽無雙登賢能之書對策第一自翰飛于仕路諒冠
映于朝倫職佐地官頗版圖之增羨經中博士亦綿蕞
之居多矧復叅汗簡之刊修奉和鑾之遊豫陪外庭之

高議次藏室之遺編氣蓋羣英吞雲夢者八九辯推異
學服稷下之千人莫之敢當無出其右汝南品格固首
出于月評天祿職司亦久次于官牒爰膺慎東尤謂美
遷麟臺仍草於國書雉省共評于事典上應列宿蓋懸
象之著明藏之名山乃立言而不朽職業甚重公論攸
歸側聽風聲用清心目顧忻愉之所集辱賤簡之俯臨
荷眷獎之殊深豈引喻之能既

與集賢楊太博啟

竊以待詔承明之庭漢得人而為盛修書麗正之殿唐
置使以甚雄故子雲以詞賦擅名燕文以史筆自任汜
今官司未改祿秩彌優公宴舉觴禮均四輔禁門通籍
地接千廬自非學洞縑緗識叅繫象博物幾乎子產屬
文似于相如即何以記三篋之書諸儒歎伏獻四巡之
頌當宁嘉稱允屬宗英式光俊選太博學士仁兄治行
尤異秉心塞淵體大雅以成文蹈中庸而為德朱絃疏
越宛有正聲玉水方流自懷至寶由計偕而旅進乃籍

甚以馳稱紫庭亟覩于決科黃綬旋聞于隨牒刺姦南部載宣懸棒之威求瘼番禺益勵酌泉之操適討論于邦典仍幹掌於闕征聚貨殖于五都米鹽斯劇考質文于三代綿絕居多俄慷慨以上書果深嚴而召試平津第一諒博極于天人江夏無雙且恣觀于圖史顧亭途之伊始實與議之攸歸矧瀛洲列仙之珠庭羣玉上帝之冊府昔者金泥石礧嘗草東封之儀縹帙芸籤重定開元之月今天孫俟翠華之幸屋壁藏科斗之書必將

講故事于乾封聿修盛禮訪遺編於汲冢大備闕文罄
竭誠明彌縫職業苟非鴻碩曷副疇咨某忝預宗盟並
荷堂構二惠敢期于競爽萬石徒喜於不衰側聽寵遷
幾至抃舞幸同栢悅誠臭味之靡殊願比葛屨庶本根
之攸庇豈期撫抑先賜賤函感惠顧之所臨但佩服而
無斁

上河陽太師相公啟

伏覩內降制書伏審太師相公榮膺寵命伏惟慶慰伏

以太師相公道光人傑才耀國楨克彰佐命之勲夙茂
經才之績爰自總萬機之宥密擁十乘以藩宣敦郤穀
之詩書聿開義府仗孔明之節制載肅戎麾鳳池爰副
於具瞻虎落尋清於外侮執圭肆覲奉旒宸於當陽裂
壤增封錫山河於右地今者卜郊定位類帝禋宗降明
詔以褒功推湛恩而進律開府之貴均禮秩于三公賜
履之榮益井田之千室允為異數載答殊庸某夙荷重
知方遙巨屏側聞成命竊抃丹衷望初筵而莫遂鳬趨

瞻大廈而空懷燕賀依戀之至倍萬常情

上陳州太尉相公啟

伏審光奉制書榮加寵命伏惟慶慰伏以太尉相公天
資全德岳降上靈黃石一編早契神傳之妙傳嚴三命
式符帝賚之祥爰自蘭錡訓兵齋壇謀帥伏波方略既
闇合于孫吳卻穀詩書遂率先於狐趙而鑿門受律堅
壁防秋斬級雲中克清氛祲散金廡下大振威名旗常
備載於勲庸屏翰益光于倚注式分右地爰踐中台申

伯藩宣諒夾輔于周室段干偃息蓋臥治于淮陽今者
肆類郊丘推恩方鎮進掌武之秩用冠三公加食菜之
封更踰千戶表聖朝之尚德見明詔以褒功慰四海之
具瞻實九鼎之增重某分庭納顧雖殊荀范之衆人賀
厦翹誠莫預申陵之下客欣戀之至倍萬等夷

又

近者伏蒙台慈特奏建州浦城縣道場觀音禪院僧德
威已勅下賜紫衣者仰荷恩私伏增榮感竊以某旋惟

單緒門襲素風清白相承本從關輔亂離云瘼尋徙江
吳更因唐季之稱兵遂抵閩禺而占籍堂構已經于數
世松楸皆在於彼方爰從祖禰已來雅奉竺乾之教聿
崇像設式表歸依乃建精廬載延開士捨良田而供給
闢淨土以焚修僧德威實主仁祠能邁戒律雖四衆闡
繞彌天之辯未聞三界輪迴出世之緣尚淺然克稟六
和之訓頗通九部之文梵宮式籍于主張相府遂形于
陳乞敢謂太尉相公俯矜懇悃特賜允俞奏章遠達于

宸嚴命服遂沾於慶澤光生鷺嶺喜動鷄園諒衣錦還鄉豈讓買臣之故事在種蓮結社更修惠遠之良因顧于鰥生實受大賜雖窮毫幅難叙感銘

與兩浙轉運史館孫起居啟

竊以古者設記言之官立司過之史職當汗簡固君舉而必書事及翦桐表王者之無戲爰自分曹兩掖通籍九門陪鹵簿於林光出叅法從接公槐于丈石入奉內朝最親咫尺之顏實草起居之注自非通邱索典墳之

學挺忠肅恭懿之姿即何以束帶影纓預周行於螭陛
懷鉛持槧約魯史於麟毫允屬時英克符師錫起居學
士詞源沃日文律融春潁水生賢占荀爽無雙之譽漢
庭發策得平津第一之科外叅竹使之符歸踐石渠之
署閱圖書于冊府方討典經幹鹽鐵于縣官遽商功利
自爾陟諍臣七人之列足太倉九歲之儲靡施次骨之
文而庶邦震肅不假析毫之術而內帑充盈率經義以
治財奉詔條而集事爰膺慎簡聿副疇咨亟推進秩之

恩更賴當官之業昔張蒼以列侯之重主郡國之計書
杜預以常伯之崇領江淮之轉運允資餘地兼總外臺
分南董之官曹運研桑之心術即俟上林朽貫復金盛
於西京大輅鳴鑾展封崇于東岱便入金鰲之署式揮
玉牒之文翹祝之誠實在於此

與史館檢討陳祕丞啟

伏審光奉聖恩榮兼美職伏惟歡慶竊以良史之任歷
代所難自非通倚相邱索之書專羊盼春秋之學博物

稽古多識舊章變例發凡深窮微旨加以書法不隱有
骨鯁之風多聞闕疑無胸臆之論三長之才識兼備六
家之論議所宗即何以繡斧袞章由一言而褒貶芸籤
縹帙垂百世以勸懲適會昌辰聿崇大典筆削之任推
擇攸先綸綍之行僉諧允屬秘丞學士德侔溫玉道類
直繩勵清節以澡身聚多文而潤屋祥標竹箭早擅價
於東南譽冠雲龍實飛聲于京洛爰自懸科命中通籍
允升黼藻斯文羽儀列辟南州高士揜茂躅于置芻漢

庭諸公讓博聞於重席乃至薦雄之章狎至召鄒之命
亟行猶復未登兩馬之車願奉三年之計既解龜而受
代方束帶以立朝果召試于清臺遂榮歸于延閣掌載
言于汗簡佇昭明于策書資待問于撞鐘式講求于典
禮南董將伸于遺直游夏豈敢以措詞自茲素王繫月
之文不從廢墜絳老疑年之對有所咨詢永為吾道之
指南克副大君之虛佇幸覩得人之盛但萌竊抃之心
遽辱賤封備形謙抑感慙忻荷無以喻名

與孫舍人啟

竊以三代誓命著于尚書兩漢訓詞號為爾雅然而經祖龍絕學之後頗多闕文處金馬切問之司止令視草故方策之言未備亦潤色之業非專爾後慎選臺郎入居禁闥殿壁塗粉始更主于文書省樹棲雞亦通掌于制誥施及唐室實司堯言職業洎于掖垣備存六典判署聯于台鼎是號五花乃至奉武帳之論思平文昌之奏議泛樓船于汾水舉觴中流校羽獵于長楊獻賦行

在陟降上帝之右親日月之光華踐履赤墀之塗接夔
龍之武步蓋從臣之佳選固明主之簡心舍人素履時
中英詞鼓動敏行具聖人之體博聞推君子之儒爰自
委質休辰飛名華貫鴻都汗簡復春秋之舊章螭陛含
毫成起居之新注適屬疇咨俊乂啟迪徽猷俄召試于
宰司遂榮登于禁掖言成綸綍用裁誕告之文腰佩龜
綬更旌稽古之力欽聞成命允叶至公某夙以孱庸濫
塵清切妨賢有素補職無聞媿彌切於濫竽榮遽諧于

倚玉盈川自省謬居廬駱之前文園後來合處鄒枚之
右尚茲始隗安敢望回蹶蹈唯覺于負芒澄汰誠甘于
幙被忽承賤簡過示謙冲仰荷眷私伏增銘悚

與祕閣劉校理啟

竊以中祕之府實藏王者之書簡策相沿規模咸在是
以麒麟之閣西京典於校讎蓬萊之山東漢徵於比象
乃至薛夏建議內外始分鄭黜勵精朱紫斯別既備三
閣之制度且列四部之籤題施及聖朝申明前典直太

微之左掖飛觀雲連購先秦之舊編縹囊山積詳延俊
乂崇樹官司義府攸歸卿材是育修書仙殿遠俾置使
之雄待詔公車用顯得人之盛自非髦彥豈預僉諧某
官德茂溫良詞標典麗爰自命鄉觀國筮仕策名縣道
臨民適動徒勞之歎銓衡課吏薦登尤異之科屬慎東
之方初俾有司而試可及服勤之云畢果明詔以疇庸
遷棘寺之要官掌蘭臺之祕記步武石渠之近署討論
金匱之羣言扈蹕甘泉即獻從臣之嘉頌紬書天祿佇

期太一之下觀乃眷方隆雄飛莫測

與嚴殿丞啟

旬日前特蒙殊念垂示華編曲形過聽之私俾獲榮觀之願耽味無斁降佩兼深竊以伏羲之受河圖述作由茲而始仲尼之為木鐸文章可得而聞自茲秉筆之流固亦駕肩而出立言不朽何代無才殿丞刻志縑緗勵精翰墨爰自命鄉論秀早中高科學古入官不忘素業賸化成之深旨體潤色之宏規登高動能賦之心下帷

有著書之志乃至作檄楯上聿成挿羽之文詠詩坐中
特擅燃箕之妙及從大夫之後益彰君子之儒方今開
祕閣以集時髦剝甲兵而崇學術巖廊贊德載賡元首
之歌玄扈凝神更第從臣之頌眷惟俊乂即副東求豈
意頑疎許披藻麗文以博我蓋辱于同聲暗而投人恐
成於虛擲但諷誦于唇吻永緘秘於巾箱自茲已還未
知所措

與史館王大著啟

竊以太史之職受郡國之計書中祕之司掌古今之載
籍爰暨方來之服式隆再命之榮自非時髦豈塞僉議
大著學士才名籍甚意行瑰琦挺丘園耿介之姿澤霧
雨文章之美爰自薦能鄉老階尺木以方初命中澤宮
聽先鳴而咸服旋策賢良于祕殿遂登造秀之首科諸
生偃于下風萬乘幾乎前席千里之足果見繫于場苗
連城之珍終混成于國器俯及瓜時之代俄頒芝檢之
文落筆中書之堂英詞煥發束帶大夫之後成命亟行

便高踐于石渠仍寵加于銀印書法不隱既遺直之是
資車服以庸亦稽古之無忝佇演素臣之傳克成青簡
之功入直深嚴只在伊匪

與王虞部先輩啟

竊以江左取士東堂存策試之名唐室求材南宮設科
第之盛得賢之美垂裕無窮允屬欽明克敦文雅臨軒
考校前席諮詢張穀以攬英雄錯薪而刈翹楚堯心定
于取捨軒鑒照于妍蚩揜曠代之舊規著聖朝之令典

顧惟褒博實契遭逢郎中先輩羽畎竒姿空峒勁氣夙
負佐王之路不閱非聖之書彪炳成文虎豹異犬羊之
羶扶搖上擊鴻鵠非燕雀所知矧以束帶金閨含香畫
省擁彤襜而刺郡曳朱紱以立朝而猶獻志業于公車
希彙征于貢部鐘鼓在宮之韻固已聲聞琮璜成器之
珍豈煩試可東頒芝檢高踐桂科題鴈塔之姓名榮聯
玉籍赴杏園之宴集載促星軺極美事于昌辰鼓芳風
于文苑寵章舉集顯遇方初敢謂恩私特貽賤翰

祭文 七首

宣陽觀祈雨文

咸平二年月日知軍州事楊某謹遣麗水縣尉侯儼以
香黍酒紙之奠致禱于宣陽觀葉天師之神卉物具腓
驕陽為患倬彼雲漢昭回于天畏景戴炎膏澤靡降川
源將竭稼穡卒瘁比屋嗷嗷大命近止去歲小歉斯民
薦飢貧者不厭于糟糠富室亦空於擔石糗禁啜菽力
耕數耘期乎有秋以續其命而朱夏將半溽暑方隆肥

蠱興妖旱魃為虐人亦勞止天其忍諸唯神佐佑化工
惠綏茲土廟貌載肅陰隲孔昭乃眷含生詎可無意人
者神之主食者民之天民失其天遂至於死神乏其主
復將疇依神其鑒茲下誠請于上帝使龍起沮澤蛟躍
曾波電鞭一揮雨足散灑溝塍流溢溪谷沸騰藁然善
苗如握而長年穀大稔厲鬼不行家獲倉箱之儲人免
塗炭之患當潔祀典以荅神休若分野纏災陰陽作沴
凡有殃咎宜加守土者之身百姓無辜庶可以免

宣陽觀賽雨文

近以愆伏之氣沴于陰陽旱暵之災延于稼穡某忝守
茲土不敢遑寧雖天災流行厥有冥數而神道正直享
于至誠惟天師敷佑一方歷祀浸遠功濟萬彙化馳九
幽慘舒天吏之權陟降上帝之右肇建真宇聿為殊庭
尸祝具陳若亢倉之居岷嶴祭祀不絕猶朱邑之在桐
鄉靈貺孔昭斯民攸賴是用備菲薄之奠陳危苦之辭
願以一介之軀少贖百姓之命精意懇禱冥感玄通山

川出雲天地交泰祁祁甘澤濡涸轍而有餘萁萁原田
取嘉穀而可冀明神無乏祀之媿農夫慰望歲之心夫
如是神之降祥至矣民之受賜深矣當與周弃播種百
穀勾龍平易水土功德相若社而稷之雖罔蠶無方高
明不宰然豺獺有祭亦出於自然泰稷非馨豈資於備
物爰潔祀典以答神休適因昭報之辰更露虔祈之懇
以畏日流毒多稼向榮水泉枯乾山田磽确民非稻不
食稻非雨不滋秋孟已來浸潤恐竭豈昔也如響之斯

答而今也為惠之不終一簣之功儻或中輟一溉之益
亦必後枯神其鑒茲下誠終乃前列殞越顛沛罔敢自
安洗心滌肝仰冀冥助

中書祭周王文

惟靈毓質星潢分輝霄極性資敦敏體茂溫文內寢承
顏辯彰對日上庠齒胄兆啟洊雷篤慈愛於兩宮襲慶
靈於百世在三之訓允契於生知並建之文式光於邦
典將佇壽街之對遽促瑤山之期美疹弗瘳英猷永謝

悲纏宸扆痛結宮闈神醫靡逢致倉舒之不幸仙期斯
迫同子晉之上賓今者先遠戒辰塗芻備物掖庭悽咽
行路涕洟某等叨預弼諧實均休戚吹銅叶吉早徒祝
於靈長埋玉興嗟今永懷於徽懿聊陳薄酌用薦丹誠
明哲如存儻垂歆鑒

中書祭安王文

惟靈溫文毓德明允存誠自天攸縱乘時挺生始勝衣
而趨拜乃錫壤以連城銅梁并絡朱方廣陵時惟邦翰

迭寄宗英列邸清禁藻祝連薨趨朝文陞佩玉鐸鳴傳
百世之本枝蒼龜襲吉對三雍之雅樂簡策飛聲爰自
蒼震承乾龜蒙胙土分寶玉以展親增脈膳之異數宗
子賴以維城王室繫其夾輔每為善以自娛唯聚書而
是務揜河間之藝文盛兔園之詞賦桐圭之寵方深駟
隙之光靡駐遽歎逝川倏悲先露空碣館之金臺悵淮
山之桂樹爰詢遠日乃卜新阡兆逢龜食地得牛眠啟
佳城於旭旦瘞美櫬於重泉顧銘旌之將引實行路以

淒然某等獲事公朝謬塵宰府每接音徽親陪步武痛
仙馭之賓天閉夜臺而終古拜送靈輶躬陳薄醑聊執
紼以申哀慨臨觴而不御

二司使祭安王文代上谷公

惟靈若木分輝渾金毓質性敦孝友體茂溫文爰自賜
策漢庭作藩益部乃眷斗牛之分盡荒淮海之邦克樹
風聲以屏王室洎膺乾出震運啟重熙分器米章禮加
異數茂徽猷於麟趾錫壤地於龜蒙方將傳百世之慶

靈奉兩宮之歡讌俄遘夢楹之禍忽嬰藏壑之悲藥靡
驗於上池神遽歸於大素梁園霰雪悵枚叟之何依緱
嶺烟霞與浮丘而共往今者將臨遠日永即幽局鹵簿
宵陳銘旌前引哀深行路痛結宸闕某幸忝國恩式司
邦計愴磐維之永謝屬窀穸之有期泣送靈車躬陳薄
酌仰期聰直尚克歆嘗

代王氏祭故鄭國長公主文

惟靈寶婺淪輝銀潢毓粹降靈帝胄稟訓公宮居循圖

史之規動叶珩璜之節爰自降嬪啟兆下嫁承榮仁洽
宗姻禮均娣姒天光燭耀式諧鳴鳳之占戚里懽怡仰
賴卿雲之蔭不謂哀門薄祐神道挺災秦樓運迫於登
仙魯館哀纏於復魄九轉之丹靡驗百身之贖奚為六
親悲極於墜淵九族痛深於崩角今者俯臨先遠奄及
攢塗池翼啟行笳簫載路望靈輶而雪涕徒極攀號酌
清醑以薦誠尚希臨鑒

中書祭鄆王文

惟靈分暉霄極毓德英藩謙卑不伐慎重寡言爰自分
封胙土授冊臨軒疏邸第於禁闥奉朝謁於天閣碣館
平臺與正人而遊處燕居退食唯善道以思存膚哲承
乾文思廣被寄重維城禮優分器自閩粵之名區易咸
陽之內地紫微八柄之崇帝傳三槐之貴寵極褒揚恩
隆宴喜郊丘助祭夙夜齋莊方嶽陪鑒風霜跋履擅占
對於璧池暢聲詩於麟趾皇輿展義京邑居留委茂親
之管籥清多壘之戈矛念神州之重任戀重瞳兮涕流

俄在膏兮生疹顧勿藥兮靡瘳啟白日之佳城於茲永
已瞻小山之桂樹不復重遊痛結宸襟兆開真宅卜遠
日於元龜咽哀笳於廣陌遡窀穸以言歸愴音徽之永
隔某等叨榮台席接武晨趨想英風於世表望靈輒於
路隅永懷明德寅奠清醑期降靈兮盼蠶恭執紼以躊
躇

齋醮文

七首

惠明皇后忌日讚佛文

伏以神遊已遠方尊如在之靈佛事載嚴用植無邊之
福爰及上仙之日聿崇衆善之因伏惟惠明皇后積德流
光敦仁錫羨長秋追號允鍾似續之祥清廟薦誠克茂吉蠲
之禮今皇帝運鍾下武義篤奉先祇荷宗祧永懷祖妣
俯臨諱日誕舉國章特就精藍聿陳淨供會威德六和
之衆瞻慈悲三界之尊庶憑金地之良緣克奉玉清之
仙駕惠明皇后早蒙佛記常住天宮受百福之莊嚴証
一乘之解脫配食永隆於廟貌卜年更祐於邦家今皇

帝伏願位固金輪功周沙界五兵不試盡銷楚鐵之英
萬壽無疆益茂莊椿之算然後願列藩荷寵更隆磐石
之基當國輸忠永著和羹之効百辟咸傾於誠節萬民
共樂於升平凡居覆幬之間同被文明之化

代門下相公承天節讚佛文

伏以妙覺能仁出現於大千世界深慈救物宣說於十
二部經形悲智以悟羣生示辯才而持正法龍宮海藏
爰秘於金文東夏南閩式傳於像教所以植衆德之本

結淨土之緣趨三寶以歸依發一念而迴向六時讚唄
克成上善之因四事恭勤用廣有為之福伏願尊號皇
帝陛下金輪益固玉葉彌芳體大德以庇民推至仁而
御宇深信內典入不二之門安住佛乘享無量之壽永
保後天之真長為諸夏之尊然後願寓縣承平類四禪
之清淨朝野多慶承百福之莊嚴止戈載洽於昌期拂
石莫量於浩劫凡居法界盡証菩提餘請表白

元德皇太后忌日讚佛文

伏以堯門積慶適鍾聖母之祥佛國往生更賴法王之
力屬忌辰之斯屆痛仙馭以難追伏惟元德皇太后沙
麓炳靈塗山毓德紀徽猷於彤管美播聲詩伸嚴祀於
闕宮禮崇孝饗今皇帝表懷顧復深念劬勞感昊天罔
極之恩崇淨土有為之果每值上仙之日克修衆善之
因瞻十力之慈尊會五天之梵衆載嚴佛事式奉神遊
元德皇太后伏願聞法靈山棲真內院念超三界高臨
解脫之方智入一乘早証摩耶之果今皇帝伏願金輪

永固寶厯彌昌武庫橐弓見遠夷之率服仙衣拂石同
聖壽之延洪然後藩屏磐維固本枝於百世樞衡鼎鼐
平懸象於三階羣官盡効於忠貞萬姓咸躋於仁壽

代僕射李相公承天節設齋讚佛文

竊以六通應供從兜率以降生三藏契經假貝多而流
布所以作羣迷之歸救述大事之因緣自夢叶於金人
始俗傳於像教香花四事式陳於焚修鐘梵六時聿嚴
於齋供爰植無邊之福用成衆善之因伏願尊號皇帝

陛下位等金輪功周沙界道齊千佛澤被四生邊陲載戢於五兵府庫常盈於七寶御世比能仁之福統天同大梵之尊八部歸依六戎款附華封祝聖克隆萬壽之期震旦興王永護一乘之法然後願朝野多慶興禮樂於三雍寓縣無虞息烟塵於四鄙載洽淳熙之化同躋富庶之鄉凡在含靈並登正覺伏請表白

明德皇后中祥讚佛文

伏以丙殿上仙四氣俄周於歲律祇園薦福一人方極

於孝思是崇出世之良因以奉在天之神馭伏惟明德
皇后高丘襲慶沙麓儲祥作合神宗二紀式隆於陰教
居尊長樂萬方同仰於母儀俄運逼於真遊固哀深於
宸極今皇帝至仁守位盡禮事親慶方洽於承顏悲忽
纏於曷恃家邦異制勉遵易月之規霜露永懷彌切因
心之感玄寢已終於遠日忌辰爰及於中祥特就精藍
虔修淨供會南洲之開士崇西竺之妙緣庶憑大覺之
深慈克証上生之聖果明德皇后伏願寶乘悟法花界

棲神受佛記於雙林福星圖於百世今皇帝伏願萬靈
薦祉千聖垂休壽考無疆克叶山呼之數千戈載戢永
扶海晏之祥然後願親賢毓德於懿藩輔弼宣猷於宰
府羣后竭輸忠之効庶邦堅共治之誠凡居普率之間
共洽升平之化

太宗皇帝忌日讚佛文

伏以軒遊已遠百年方仰於威神堯歷惟新萬乘彌深
於孺慕每屬上仙之日益懷罔極之悲是崇衆善之緣

式廣因心之孝伏惟太宗神功聖德文武皇帝握樞御
極恭己臨民耀神武以混車書體至仁而懷動植焦勞
致治早鍾厭代之期錫羨貽謀光啟卜年之祚今皇帝
允膺帝錄誕擁天休紫壇隆升配之儀清廟著不祧之
典辟容載穆聿嚴如在之靈諱日俯臨更極以時之感
爰就布金之地仰瞻被袞之儀四衆翹誠千官就列遵
竺乾之教修香積之齋用憑供佛之良因以奉在天之
神駕太宗皇帝伏願高居智地常御寶乘証大梵之尊

嚴俯祐三千之界福丕圖於悠久彌昌億萬之年今皇
帝伏願八表歸仁百靈薦祉西清聽斷垂裳臻大定之
期東岱告成探策表無疆之算然後願黃扉良弼益光
咨嶽之謀朱邱茂親克保維城之訓四氣咸均於嶰谷
五兵永戢於靈臺凡居普率之間共樂淳熙之化

為中書相公作醮文

竊以天道玄遠每居高而聽卑神理聰明唯至誠而通
感矧處最靈之列仰承洪覆之仁荷戢穀以居多被寵

光而彌厚實懷憂於非據輒謝過於已然伏念某本以
諸生早塵貴仕再登廊廟驟正台衡徒竭寸誠無裨大
政久辱高位頗鬱具瞻當循名責實之秋處論道經邦
之地萬錢賦祿但愧於素食百度彌綸更聞於補職有
妨賢路深畏官箴且慮徼福逾涯貪榮過分冒茲人爵
或致身災是用虔瀝至懷上祈玄造伏冀高穹降鑒列
緯儲祥察茲夕惕之心矜以時亨之幸少歆蠲潔俯納
精誠垂祐顓蒙俾銷罪沴懇禱之至殞越無從



武夷新集卷二十